

Ex - Gezaghebber di Aruba, sr. Oscar Henriquez:

Mester tene cuenta cu trahamento di edificionan moderno cu no ta pas cu nos caracter di caribe

STA. CRUZ - Bestuurskantoor ta keda un discusion den nos comunidad y ta pesey mes nos a conversa cu un di e prome gezaghebbernan di Aruba, sr. Oscar Henriquez cu tambe a eherce e funcionnan di deputado pa 8 aña y despues a bira gezaghebber di Aruba pa 10 aña largo unda cu el a baha como gezaghebber na aña 1972.

Sr. Oscar Henriquez a trece padilanti cu e añanan ey tabata hopi interesante y e ta masha contento cu por a participa den e gobernacionnan pero sinembargo e tempo ey ta hopi cos nobo a wordo haci ya cu ta di e temponan ey a cuminsa cu Turismo.

A traha e tempo ey aeropuerto, L.G. Smith Blvd y Irausquin Blvd. Asina a habri caminda pa cuminsa traha hotelnan banda di beach y a traha e prome 2 hotelnan grandi; a traha tambe un baki grandi pa awa y coriente pa asina tabata tin suficiente awa y coriente pa Aruba. Sr. Oscar Henriquez ta splica cu hopi cos a wordo haci pa asina yuda Aruba cu awe nos tur ta probecha di dje. Pa Oscar Henriquez, e edificio di Bestuurskantoor ta significa hopi p'e ya cu ta pa hopi aña el a traha den dje y a tuma decisionnan importante tambe pa Aruba. Sr. Oscar Henriquez asplica cu prome cu el a traha pa



deputado y gezaghebber di Aruba, el a traha den e Departamento di Finanzas den e mesun edificio cu ta e bestuurskantoor actual pero sinembargo tambe sr. Oscar Henriquez a trahatambene edificio bieu cu tabata e prome bestuurskantoor cu awe ta Corte di Husticia y despues a muda bay den e bestuurskantoor nobo cu te dia di awe ta bestuurskantoor.

Te di a di awe na momento cu sr. Oscar Henriquez mira e edificionan unda el a traha y unda el a tuma decisionnan importante, e bunita sentimiento a keda di por a traha y haci hopi pa e pueblo di Aruba. Den e temponan ey e edificio nobo di bestuurskantoor tabata un bon escogencia pa a traha unda cu tur e deputadonan a haya nan oficina y a traha den un bon ambiente y na unda cu hasta chistenan tabata cay. E Gobierno actual kier sea elimina e edificio di bestuurskantoor of bashe abao sinembargo sr. Oscar Henriquez ta

trece padilanti cu nos aki na Aruba no por keda mara na tempo bieu pero si mester tin un mente habri pa cualkier desaroyo nobo pero toch loke si lo duel sr. Oscar Henriquez ta si Gobierno mester bende y bay benta e edificio abao y si mester bay traha edificio nobo. Ta spera cu e arquitecto lo bay traha algo cu e mesun diseño di antes cu ta pas cu e waterfront.

Sr. Oscar Henriquez ta trece padilanti cu e ta haya masha lastima cu e Ministerio di Finanzas cu nan ta trahando actualmente ta un edificio sumamente moderno unda cu e edificio no ta mahos pero si cu e no ta pas pa Aruba ya cu por a haci algo cu e parti di pafor cu sikiera ta parce un edificio cu ta di Caribe manera por ehempel e edificio di RBTT, Banco Central cu si ta pas den e estilo di Caribe. E arquitectonan mester tene bon cuenta cu si mester keda traha edificionan asina ta trece un ambiente cu

bo no ta parti di Caribe mas y cu esey ta un lastima y na unda cu ya caba tabata tin reaccion di Turistanan cu no ta scoge pa bini Aruba mas debi cu nan no ta sintinan den un isla Caribense pero nan ta sintinan manera cu nan ta na nan propio lugar.

E ta un lastima pa por tende tipo di reaccionan asina debi cu nos ta un di e poco islanan den Caribe awor aki cu no ta pas di ta un isla Caribense mas. Si tabata tin un maneho di Gobierno cu ta bisa cu bo ta bin cu edificionan nobo, cu nan por ta moderno pero cu parti di paden, sikiera e estilo di pafor por keda pas den e sistema Caribense. Sinembargo Monumento Bureau ta luchando pa conserva tur edificio cu ta un

monumento y pa sr. Oscar Henriquez si ta posibel no conserva solamente e edificionan cu a den caya so pero tambe tur e edificionan bieu y tambe esnan nobo pa mantene e estilo di Aruba dus e estilo di antes pa asina Aruba no perde su caracter, naturalmente arquitectonicamente.

Tambe sr. Oscar Henriquez ta haya un lastima cu Gobierno a aproba e plan di edificio di RIU Hotel na Palm Beach, e Hotel Riu ta pas berdad masha bunita na Morocco pero no aki na Aruba. E no ta pas mes den e strip di nos hotelnan y ta masha lastima cu e departamentonan concerni a aproba e plan di RIU Hotel.